

Chantun e regiun profiteschan

Cazas: Nov stabiliment giudizial serrà

DA GION NUTEGN STGIER / ANR

■ **Suenter ina planisaziun da 12 mais ha gi lieu ier l'emprima badigliada per la construcziun dal nov stabiliment giudizial serrà dal chantun. Quel project custa 119 milliuns francs e bunamain ina terza da quella expensa surpiglia la confederaziun. L'avertura da la nova praschun duai esser vers las fin da l'onn 2019. Ier èn ils cussegliers guvernativs Mario Cavigelli e Christian Rathgeb sco er Markus Dünner, il schef da l'uffizi da construcziun auta, stads preschents a l'emprima badigliada da la nova praschun. Da la partida è er stà Mathias Fässler, il manader da l'Uffizi per l'execuziun giudiziala dal Grischun. Realisà vegn il nov object en la vischnanca da Cazas e quai a Realta. Il nov bajetg remplazza la praschun Sennhof a Cuira che na correspunda oz betg pli al standard da segirezza, il manaschi è betg pli optimal ed ils collavuratur èn schizunt per part en privel. Per quel nov edificzi investescha il chantun 119 milliuns francs e da quella summa surpiglia la confederaziun 33 milliuns francs.**

152 posts per delinquents

Cun la realisaziun da la nova praschun a Realta e cun serrar la praschun dal Sennhof va uschia a fin suenter 200 onns ina gronda istorgia. En la nova praschun vegnan a lavurar 110 personas e da quellas vegnan occupadas 80 dal tuttatfatg da nov. Plinavant pussibilitescha la concentraziun da l'execuziun giudiziala a Realta da trair a niz differents sinergias cun ils manaschis vischins, la praschun existenta ed averta, cun 100 posts. Il stabiliment giudizial serrà cumiglia totalmain 152 posts per delinquents. Planisadas èn 10 plazzas en la partiziun d'entrada, 100 plazzas per l'execuziun normala, 20 plazzas per delinquents cun disturbis psichics sco er



En cuntents che la realisaziun dal stabiliment giudizial serrà daventa realitad: Mario Cavigelli, cusseglier guvernativ, Markus Dünner, il schef da l'uffizi da construcziun auta, Christian Rathgeb, cusseglier guvernativ e Mathias Fässler, il manader da l'Uffizi per l'execuziun giudiziala dal Grischun (da san.).

FOTO G. N. STGIER

10 plazzas en la partiziun da vegliadetgna. Totalmain 12 plazzas èn previsas per l'execuziun da l'arrest d'inquiziun, per l'execuziun da chastis da dunnas e da giuvenils sco er per chastis da detenziun subsidiars. Realisà vegn il project tenor ils plans dal biro d'architettura D. Jüngling + A. Hagmann da Cuira. Circumdà vegn l'areal da la praschun cun ina surfatscha da set hectaras cun in mir ed ina saiv cun ina otezza da set meters. Las lavurs da construcziun fan per gronda part las interpresas Implenia/Hew SA e la Käppeli SA.

L'entira regiun profitescha

En in'emprima fasa da construcziun vegnan spustadas las lingias d'infrastructura, deviads ils auals da la val ed i vegn cumenzà cun la construcziun da l'edificzi cumpensatoric per l'orticultura. A l'entschatta da l'onn 2017 saja prevì da cumenzar cun las lavurs da l'object, ha ditg cusseglier guvernativ Mario Cavigelli. L'edificzi saja er ord vista economica da gronda impurtanza per il chantun. Cusseglier guvernativ Christsian Rathgeb ha menziunà che quella nova praschun vegnia ad esser da

gronda valur per l'entira Svizra orientala nua che da preschent mancan intgins posts per metter sut tetg delinquents ed arrestads. *Eduard Decurtins*, il president da la vischnanca da Cazas, ha ditg che da quella nova praschun vegnia a profitar l'entira regiun e quai en diversas modas. La vischnanca saja loscha ch'il chantun haja decidì da realisar quel stabiliment a Cazas, quai che saja er ina confidenza envers las instanzas politicas. A Cazas na saja er betg vegnì fatg opposiziun cunter quel project, ha punctuà Decurtins.